



Icyegeranyo cy'amakuru y'imikino yaranze icyumweru

2023

Taliki 23–25 Kamena



P.1 U Rwanda rwifatanyije n'isi yose kwizihiza umunsi mpuzamahanga Olempike

Ijambo ry'ibanze

Komite Olempike y'u Rwanda yashyizeho iki cyegeranyo mu rwego rwo kurushaho kumenyekanisha ibikorwa byayo n'iby'abanyamuryango bayo (Amashyirahamwe y'Imikino mu Rwanda) hagamijwe gukomeza guteza imbere siporo no kuyikundisha Abanyarwanda muri rusange by'umwihariko abakiri bato.

Iki cyegeranyo gikubiyemo amakuru n'ibikorwa bya siporo byaranze icyumweru, kikazajya gisohoka rimwe mu cyumweru.

Ntigitimbura kandi izindi nzira Komite Olempike y'u Rwanda isanzwe ikoresha mu kugeza amakuru ku banyamuryango bayo n'abanyarwanda muri rusange.

Ibirimo

- P1 U Rwanda rwifatanyije n'Isi yose kwizihiza umunsi mpuzamahanga Olempike
- P2 **Basketball** : Ikipe y'u Rwanda yabonye itike ya "FIBA AFROCAN 2023"
- P2 **Boxing** : Ikipe ya Gacuriro BC ni yo yegukanye irushanwa ryo Kwibuka
- P3 **Football** : Munyantwali yatorewe kuyobora FERWAFWA
- P3 **Wheelchair Tennis** : Hakizimana na Imaniragena begukanye irushanwa ry'abafite ubumuga
- P4 **Special Olympics**: U Rwanda rwegukanye imidali 3 mu mikino y'Isi
- P5 U Rwanda rugiyeye kubona Pisine Olempike
- P6 **Volleyball** : Gisagara VC na Police VC zegukanye irushanwa ryo Kwibuka

Taliki 23 Kamena buri mwaka, Isi yose yizihiza umunsi mpuzamahanga Olempike "Olympic Day". Kuwa Gatanu, taliki 23 Kamena 2022, Komite Olempike y'u Rwanda "RNOSC" yifatanyije n'Isi yose kwizihiza uyu munsi aho ibirori byabereye kuri Kigali Pelé Stadium ahitabiriye abanyeshuri 500.

Aba banyeshuri bari baturutse mu bigo bitatu bitandukanye birimo Intwali PS, CS George Defour na Cyivugiza PS.

Mu kwizihiza uyu munsi, abanyeshuri bitabiriye bakinnye imikino itandukanye irimo kwiruka, umupira w'amaguru "Football", Handball ndetse no gusiganwa bagendera mu mifuka "Thrilling Sack Race". Ibi byose bikaba byarajyanaga no kubasobanurira no kubashishikariza kwimakaza indangagaciro za siporo ndetse n'indangagaciro za Olempike by'umwihariko ari zo kuba indashyikirwa, kubahana n'ubucuti.

Uyu mwaka wa 2023, mu kwizihiza umunsi mpuzamahanga Olempike hagendewe ku nsanganyamatsiko igira iti : "Let's Move" ugenekereje mu Kinyarwanda akaba ari : "Reka tugende" ikaba ari ugukangurira buri wese gukora siporo bikajya muri gahunda za buri munsi.

Mu butumwa aba banyeshuri bahawe bwagarutse ku bijyanye n' ihohoterwa rishingiye ku gitsina no kunywa ibiyobyabwenge. Uwari uhagarariye Polisi y'igihugu, ACP Teddy Ruyenzi yabasabye kwiha intego mu byo bakora yaba amasomo ndetse no mu mikino anabasaba kwirinda gukoresha ibiyobyabwenge kugira ngo bazagere ku ntego zabo.

Visi Perezida wa Kabiri wa Komite Olempike y'u Rwanda, Umutoni Salama yatangaje ko bishimiye uko iki gikorwa cyagenze kuko abana bacyitabiriye batahanye intego zo gushyira mu bikorwa ibyo bigishijwe bishingiye ku ndangagaciro Olempike.

Yashimiye kandi inzego zitandukanye zagize uruhare muri iki gikorwa kugira ngo kigende neza harimo ibigo by'amashuri byatanze abana, ihuriro ry'abaserukiye u Rwanda mu mikino Olempike n'abandi batandukanye.

Abana bose bitabiriye iki gikorwa bahawe icyemezo cy'uko bitabiriye "Certificate". Ibigo byose byahawe udupira na "Rackets" byifashishwa mu mukino wa Tennis. Bemereye kandi n'imipira yo gukina ya "Football" izatangwa na Minisiteri ya Siporo "MINISPORTS".

Uyu munsi mpuzamahanga Olempike wanahujwe na gahunda yo kumenyekanisha imikino Olempike izabera i Paris mu Bufaransa taliki ya 26 Nyakanga kugeza 11 Kanama 2024.



Basketball: Ikipe y'u Rwanda yabonye itike ya "FIBA AFROCAN 2023"

Taliki 17 kugeza 23 Kamena 2023 i Dar es Salaam muri Tanzania habereye imikino y'Akarere ka 5 yo gushaka itike y'irushanwa ry' Afurika rikinwa n'abakinnyi bakina muri Afurika "FIBA AFROCAN Zone 5 Qualifiers 2023".

Iyi mikino yitabiriwe n'amakipe 5 ari yo Tanzania, Burundi, Eritrea, u Rwanda na South Sudan. Aya makipe yakinye hagati yayo hanyuma ikipe ya mbere n'iya kabiri zikina umukino wa nyuma aho ikipe y'u Rwanda yitwaye neza itsinda u Burundi amanota 70 kuri 48 naho South Sudan yegukana umwanya wa 3 itsinze Tanzania.

Ikipe y'u Rwanda yahise ikatisha itike yo kuzitabira imikino ya nyuma ya "FIBA AFROCAN 2023" izabera muri Angola kuva taliki 08 kugeza 16 Nyakanga 2023.

Uko ikipe y'u Rwanda yitwaye



Boxing : Ikipe ya Gacuriro BC ni yo yegukanye irushanwa ryo Kwibuka

Taliki 25 Kamena 2023, muri Hilltop Hotel i Remera habereye irushanwa mu mukino wa Boxe mu rwego rwo Kwibuka abari muri siporo bishwe muri Jenoside yakorewe Abatutsi mu 1994.

Iri rushanwa ryateguwe n'ishyirahamwe ry'umukino wa Boxing mu Rwanda "RBF" ku bufatanye na Minisiteri ya Siporo "MINISPORTS" na Komite Olempike y'u Rwanda ryitabiriwe n'amakipe 6 ari yo Rafiki BC, Kudos BC, Amahoro BC, Intare BC, Isata BC na Gacuriro BC.

Ikipe ya Gacuriro BC ni yo yitwaye neza yegukana umwanya wa mbere aho yatahanye imidali 7 ya zahabu. Ku mwanya wa kabiri haje Isata BC yegukanye imidali 2 ya zahabu n'indi 4 ya Feza naho ku mwanya wa 3 haza Intare BC yegukanye imidali 2 ya zahabu n'indi 4 ya Feza.



Football : Munyantwali yatorewe kuyobora FERWAFWA

Taliki 24 Kamena 2023 habaye inama y'Inteko Rusange Isanzwe y'ishyirahamwe ry'umupira w'amaguru mu Rwanda "FERWAFWA" ahatowe Komite Nyobozi nshya izayobora mu myaka ibiri iri imbere.

Uko amatora yagenze

- **Perezida :** Munyantwali Alphonse
- **Visi Perezida wa mbere ushinzwe imiyoborere n'imari :** Habyarimana Matiku Marcel
- **Visi Perezida wa kabiri ushinzwe Tekiniki :** Mugisha Richard
- **Komiseri ushinzwe Imari :** Rugambwa Jean Marie
- **Komiseri ushinzwe kumenyekanisha ibikorwa no gushaka inkunga :** Rwakunda Quinta
- **Komiseri ushinzwe gutegura amarushanwa :** Turatsinze Amani Evariste
- **Komiseri ushinzwe Tekiniki n'iterambere ry'umupira w'amaguru :** Habimana Hamdan
- **Komiseri ushinzwe umupira w'amaguru w'Abagore :** Munyankana Ancille
- **Komiseri ushinzwe umutekano n'imyitwarire myiza mu mikino:** Rurangirwa Louis
- **Komiseri ushinzwe amategeko :** Gasarabwe Claudine
- **Komiseri ushinzwe ubuvuzi bwa Siporo :** Gatsinzi Herbert
- **Komiseri ushinzwe amakipe y'igihugu :** Ngendahayo Vedaste

Wheelchair Tennis : Hakizimana na Imaniragena begukanye irushanwa ry'abafite ubumuga

Taliki 22 kugeza 23 Kamena 2023 ku bibuga bya IPRC Kigali "Kigali Ecology Club" habereye irushanwa rya Tennis ry'abantu bafite ubumuga "Wheelchair Tennis National Tournament 2023" aho ryegukanywe na Hakizimana Emmanuel mu bagabo na Imaniragena Yvonne mu bagore.

Iri rushanwa ryateguwe n'ishyirahamwe ry'umukino wa Tennis mu Rwanda "RTF" mu rwego rwo gufasha abakinnyi bafite ubumuga kwitegura irushanwa mpuzamahanga rya "Rwanda Open 2023" rizaba taliki 04 kugeza 09 Nzeri ndetse na taliki 11 kugeza 26 Nzeri 2023.

Muri iri rushanwa ryabaye, abakinnyi 23 ni bo bari bitabiriye barimo 12 mu bagabo na 11 mu bagore.

Mu bagabo, Hakizimana Emmanuel yegukanye umwanya wa mbere atsinze Ndayishimiye Ernest amaseti 2-1 (4-6 6-3 na 14-12). Hakizimana yari yageze ku mukino wa nyuma asezereye muri ½, Dusabimana Viator amutsinze amaseti 2-0 (6-4 na 6-3) mu gihe Ndayishimiye yari yatsinze Dusengimana Jean Luc amaseti 2-1 (6-2, 3-6 na 10-7).

Mu bagore, irushanwa ryegukanywe na Imaniragena Yvonne watsinze Imanishimwe Yvonne amaseti 2-0 (7-5 6-4). Imaniragena yari yasezereye muri ½ Mutesi Faith ku maseti 2-0 (6-0 na 6-4) naho Imanishimwe asezereza Burasa Charlotte amutsinze amaseti 2-0 (6-1 na 6-3).



Taliki 17 kugeza 25 Kamena 2023 i Berlin mu Budage habereye imikino y'Isi mu bafite ubumuga bwo mu mutwe "Special Olympics World Summer Games 2023". Muri iyi mikino u Rwanda rwaserukiye n'abakinnyi 15 mu mikino itatu irimo umupira w'amaguru, Bocce n'imikino Ngororamubiri.

Abakinnyi baserukiye u Rwanda bitwaye neza begukana imidali 3 harimo umudali wa Zahabu wegukanwe na Irafasha Patience muri Bocce, uwa Feza wegukanywe n'ikipe y'umupira w'amaguru yatsindiye kuri penaliti n'u Bubiligi ku mukino wa nyuma ndetse n'uw' Umulinga "Bronze" wegukanywe na Niyomukunzi Milliam mu gusiganwa metero 100.

Uretse aba batwaye imidali, Cyemayire Bruce yatsindiye umwanya wa gatanu muri Bocce naho Niyibesheho Fabrice aba uwa kane mu gusiganwa metero 100.

Muri 2019 ubwo iyi mikino yaberega Abu Dhabi, u Rwanda nabwo rwegukanye imidali itatu gusa abakinnyi bari baserukiye u Rwanda icyo gihe bari bavanze harimo abafite ubumuga bwo mu mutwe n'abatabufite.

Abakinnyi bari baserukiye u Rwanda

Mu mikino Ngororamubiri hari Niyomukunzi Milliam, Ishimwe Fabrice na Niyibesheho Fabrice. Muri Bocce hari Cyemayire Bruce na Irafasha Patience naho ikipe y'umupira w'amaguru yari igizwe na Niyonsaba Mariane, Mukamanzi Yvette, Nyirabavakure Emerthe, Uwiduhaye Rosine, Kabagwira Marie, Niyonizeye Marie, Umwari Marie, Kayirebwa Liliose, Uwase Claudine na Niyogushimwa Nadège.

Umuryango "Special Olympics Rwanda" ni wo wita ku bafite ubumuga bwo mu mutwe binyuze muri siporo kugira ngo bibakure mu bwigunge.



Kuva taliki 23 kugeza 30 Kamena 2023 mu Mujyi wa Hammamet muri Tunizia habereye imikino y' Afurika ikinirwa ku mucanga "Africa Beach Games 2023".

Muri iyi mikino, u Rwanda rwaserukiye mu mukino wo Koga "Swimming", Kung Fu Wushu na Basketball ikinwa n' abakinnyi 3 "3x3".

Mbere y' uko iyi mikino itangira habaye inama y' inteko rusange y' ishyirahamwe rya za Komite Olempike mu bihugu byose by' Afurika "ANOCA". Iyi nama ikaba yari yitabiriwe na Minisitiri wa Siporo mu Rwanda "MINISPORTS", Munyangaju Aurore Mimosa, IOC Member, Rwemarika Félicité n' abari bahagarariye Komite Olempike y' u Rwanda "RNOSC" ari bo Perezida w' agateganyo, Umulinga Alice na Girimbabazi Rugabira Pamela usanzwe ari umujyanama muri RNOSC akaba na Perezida w' ishyirahamwe ry' umukino wo Koga mu Rwanda "RSF".

Haganirirwe ku mushinga wo kubaka Pisine Olempike mu Rwanda. Iyi ikaba ari Pisine yatanze n' ishyirahamwe ry' umukino wo Koga ku Isi "World Aquatics" binyuze muri ANOCA.

Mu rwego rwo kunoza uyu mushinga, Minisitiri wa Siporo mu Rwanda, Munyangaju Aurore Mimosa ari kumwe na Perezida w' impuzamashyirahamwe y' umukino wo Koga muri Afurika "CANA" akaba Visi Perezida w' ishyirahamwe ry' umukino wo Koga ku Isi, Sam Ramsamy na Perezida wa ANOCA, Mustapha Berraf baganiriyeye ku bijyanye no guteza imbere ibikorwa remezo by' umukino wo Koga.

Uretse mu Rwanda, izi Pisine kandi zizubakwa mu bihugu bya Uganda na Ghana.

Muri iyi nama y' inteko rusange ya ANOCA abitabiriye kandi barebeye hamwe ibijyanye n' ibikorwa biteganywa mu myaka iri imbere, birimo imikino y' Afurika izabera muri Ghana "African Games 2024" n' imikino y' Afurika ikinirwa ku mucanga izabera muri Guinea Equatorial muri 2025 ndetse n' imikino Olempike y' uruburiko "Youth Olympic Games 2026" izabera i Dakar muri Senegal muri 2026.



Taliki 24 na 25 Kamena 2023 habaye irushanwa mpuzamahanga rya Volleyball mu rwego rwo Kwibuka by'umwihariko abari abakinnyi, abatoza, abasifuzi n'abari abakunzi b'imikino muri rusange bishwe muri Jenoside yakorewe Abatutsi mu 1994 "Volleyball Genocide Memorial Tournament 2023".

Iri rushanwa ryateguwe n'ishyirahamwe ry'umukino wa Volleyball mu Rwanda "FRVB" ku bufatanye na Minisiteri ya Siporo "MINISPORTS" na Komite Olempike y'u Rwanda ndetse n' abandi bafatanyabikorwa barimo CAVB-Zone 5, Forzza bet ,Mukamira na Kigali Today Ltd.

Imikino y'amajonjora yabereye ku bibuga bitandukanye muri Kigali naho imikino ya 1/2 n'imikino ya nyuma ibera muri BK Arena.

Mu bagabo imikino yitabiriwe n'amakipe 12 aho yari agabanyije mu matsinda 4, itsinda A ryari rigizwe na REG VC, IPRC Ngoma VC na KAVC (Uganda). Itsinda B ryari rigizwe na Gisagara VC, IPRC Musanze na Police VC. Itsinda C ryari rigizwe na APR VC, Nemo Stars VC (Uganda) na Djuba VC (South Sudan) naho itsinda D ryari rigizwe na Kirehe VC, Sky VC (Uganda) na KVC.

Muri ½, ikipe ya REG VC yasezereye APR VC iyitsinze amaseti 3-2 (22-25, 24-26, 39-37, 25-19 na 18-16) naho ikipe ya Gisagara VC itsinda IPRC Ngoma amaseti 3-0 (25-12, 25-19 na 25-13).

Ku mukino wa nyuma, ikipe ya Gisagara VC yatsinze REG VC amaseti 3-0 (25-19,25-21 na 25-19). Ikipe ya APR VC yegukanye umwanya wa 3 itsinze IPRC Ngoma.

Mu bagore hari hitabiriye amakipe 9 aho yari yashyizwe mu matsinda 3, itsinda A ryari rigizwe na APR VC, Ruhango VC na Djuba VC (South Sudan), itsinda B ryari rigizwe na RRA VC, IPRC Kigali na KAVC (Uganda) naho itsinda C rigizwe na Police VC, IPRC Huye na Nemo Stars (Uganda).

Muri ½, ikipe ya RRA VC yatsinze Ruhango VC amaseti 3-0 (25-22,25-18,25-20) naho Police VC itsinda APR VC amaseti 3-1 (21-25, 25-12,25-23 na 25-23).

Ku mukino wa nyuma, Police VC yegukanye igikombe itsinze RRA VC amaseti 3-0 (25-20, 25-10 na 25-14). Ikipe ya APR VC yegukanye umwanya wa gatatu itsinze Ruhango VC.

Amakipe yabaye aya mbere mu byiciro byombi, abagabo n'abagore ari yo Gisagara VC na Police VC yahawe igikombe na miliyoni 1 y'amafaranga y'u Rwanda, ayabaye aya kabiri ,REG VC na RRA VC ahabwa ibihumbi 700 naho APR VC yabaye iya 3 mu byiciro byombi, abagore n'abagabo ihabwa ibihumbi 500.

Muri 2022, irushanwa ryo kwibuka ryari ryegukanwe na REG VC mu bagabo na APR VC mu bagore.





RWANDA
Olympic rings logo



commonwealth
games
RWANDA

Website: www.olympicrwanda.org

www.olympicrwanda.org/commonwealth

Email: cnosr@olympicrwanda.org |     @RwandaOlympic

Address: Remera–Hallmark Center Building KG 17 Ave